

Kutambuka mu etaata dya Kilombeeno kipya

Kipindji 5 : Efile -Mukulu aluula

Atu wuku kalolo mufubo wupwidikye wa kipandjilo wukumbane ku nkuluse. Twa bayiikiishe pa uno mufubo bwa ikalayika! Lusa; kunyima kwa Adame na Efa be tshibila abo banabeene kiimu mu Edena, bibafiki bibofule ku lufu lwa Fumu Yesu Kilisto. Lufu, lupwandjikiile muntu ooso a pano pa nsenga pa mwanda wa bubi bwaye, lubashimiishwe ku lwa mwana a Efile-Mukulu. Abifiki kwi Efile-Mukulu nabeene, beyishishe na ku lufu: « *na ku lufu lwa ku nkuluse* » Bena fidipi 2: 8.

« *Dino Eyi ndyeyendo na ndilombeene kutambudiibwa'shi : Kilisto Yesu bafikile pa senga pa mwanda wa kupaasha balwishi, byandji'mi akwibedi* » 1Timote 1 :15, Mufubo ooso wi pa mwanda wa **kifulo** : « *Anka Efile-Mukulu bashinkamisha kifulo kyaye nabeene kwatudi, kwamba'shi, pabatudi tukii balwishi, Kilisto bafwile pa mwanda weetu* ». **Bena Looma 5: 8.**

Pa bafikile bena Kilisto ba kumpala mu kuwuka Fumu Yesu Kilisto bu Mupaashi, muloo ubaadi uwule mu mashimba aabo, ube bakankamikanga namu bwa kwipaana ku mwanda wa Fumu na ku mulonda. Bibaadi kula na kwikala bibofule, na kubaadi ntato ibungi mu eshinda. Byabya, mwanda wa kukila ku lufu mu kikudi mpa na ku muwa wayikalayika bibaadi abi bakankamika bwa kulonda dino eshinda dipya dya myabi. Kubaadi kitungo kya kwikala mubatshishibwe. Mu mwisambo waye wa ku efuku dya pentakote, mutumiibwe Mpyele bakwike bino: «*Elangyeyi, na muntu oso a kwanudi abatshishiibwe mwishina dya Yesu Kilisto mu kulekyeelwa kwa milwisho; na anukatambula kya buntu kya Kikudi-E-selele*». **Mikitshino 2:38** na lwalulo lwa babatemeshanga: «*Baaba namu babatambwile Eyi dyaye babaadi babatshishiibwe*» **Mikitshino 2: 41**; Kino kikitshino kibaadi kinemekibwe, mu Mikisthino 8; mu Samadiya na mwina Etyopa bakatukanga ku Yelushaleme, ende ku ewumbo dyabo. Mu Bena Looma 6, mutumibwa Mpolo etupatulwila akyakula lubatshisho. Mu byabya, balungulanga beena kukumiina beena Beena Kilisto mu looma'shi pa ba batshishibwa babalungulanga booso'shi: «*Anulubu'shi atwe booso babatshishibwe mwanda wa yesu kisto, twibatshishibwe mwanda wa lufu lwa yesu?* » Bena Looma 6:3 Atungunuka bino: « *byabya tubashikilwe naaye ku lubatshisho, bwa lufu bya'shi bu bibasangukile Kilisto ku bafwe ku ntumbo ya Yaya, byabya na mu atwe twina kya kutambuka mu muwa upya* » **Looma 6:4.** Patubatshishibwa atuleesha Patooka'shi tubalekye kipindji kya milwisho mu muwa wetu -tubaata mbalo yeetu na Kilisto – na'shi tubatwalwa mu muwa upya naaye.

Anka bino bibashala abileesha mbangilo. Bina bushito bukata pakuleesha kwilekena kimeeno kya Isaleele na bibafisha Fumu mwilo waye binobino. Kuno kwilekeena akuleesha

kaasha penda pankatshi pa ino miilo ibidi, anka ashinkamisha ntambukilo mupwandjikile bantu ba mu kilombeeno kipya kutambuka.

Tulamiine kalolo'shi Isaleele ni mwilo wa Efile-Mukulu pa senga. Kwi bilubilo bibungi bya muntu kubanga ku kibangilo kya kupangibwa. Adame na Efa tambashikye mu kulombasha bitungo bibatudile Efile-Mukulu. Kushi kukumbasha kwa bitungo kwende nka akufwa kutamanga mu bipwa abilondo, mpa na pabayimika Efile-Mukulu : Nowa bayibaka bwato na bantu ba pa senga babayipayilwe. Nka penda bantu mwanda (8) ba kifuko kya Nowa ngi babapandjile. Kubanga pa bano bantu ba pa senga baba banga kwikala. Bilubilo bibatungunuka mu bipaso bilekeene na fudiilo Efile-Mukulu, bayitanyina Abalahama shi Akatuke ku Ur kubaadi ende ku Kanaana. Ku aa mafuku Efile-Mukulu balayile Abalahama bino : « *Nakashimisha baku Musuku oobe bekale mwilo ukata, nankakwelela mwabi na ku kutumbisha byodja kwikala nsulo ya mabi* » **Kibangilo 12 : 2** kunyima Loto kusangula kubakuminine kushaala. Atubadika biino : « *Mwanana balungwile Abalahama'shi : mu yino mbalo yoodi mwimane, buusha meeso otale mpese yooso yinanka y'Ewulu na senga ! Dino Ewumbo dyoso ndyo monoodi, nakakupa dyanka losoo, obe mpa na baku musuku obe !* » **Kibangilo 13 :14-15.**

Bi patooka muyile uno boose' shi Ayikalayika bapeele Abalahama na kifuko kyaye, mbalo pa senga « bwa losoo ». Kupatula'shi mafuku ooso akekala senga kwanka. Abalahama na bipungo byoso abimulondo ba baadi bya kwikala mwilo w'Efile-Mukulu pa senga. Mosese badi na matalwa kumpala Efile-Mukulu a kulombola Isalele paasha p'Ewumbo dibabadi mu bupika batadiile ku senga yiba balayile Abalahama kwi Efile-Mukulu. Pa mwanda wa bikitshino byabo, Ayikalayika baadi kula na mwilo waye na baadi akuwukibwa nka kukatukila kwi Mosese. Efile-Mukulu nkwitanyina Mosese ku mwengye, nkumuleesha byoso bibakitshinine Isalele na nkwakula'shi : « *pushangayi ! Su nwakokyela eyi dyande, na su nwalama kilombeeno kyande, byabya anukekala wande mwilo munkatshi mwa miilo yoso. Bantu booso be pa senga* » **Kikatukilo 19 : 5.**

Sunga mwilo ubakuminine; kulwisha kwabo kubaleshibwe bukidi pabebapeele Ayikalayika mwiya bwashi bewulame. Mbukuni bibadja kuleesha Ayikalayika lusa lwaye kwi Isalele ? Ayikalayika nkupa Mosese makoma bwa kwibaka kashibo ka mapema ; mwadya kufumankananga na Mosese na aye nkwakula'shi « *Byabya nakabombeela munkatshi mwa bena Isalele. Dingi, nakekala Efile-Mukulu aabo.* » **Kikatukilo 29 : 45.** Twina mwilo ubalayilwe senga'shi be mushaale na munkatshi mwa wawa mwilo, Efile-Mukulu akashaale mu kashibo ka mapema.

Isalele badi Ewumbo dya pano pa senga. Efile-Mukulu baadi mushaale na bantu pano pa senga. Lelo, mwilo wa Fumu ni Mwilo wa mwiylu. Twikale na lutumbu'shi bwa bena Yunda na ba shantayila, ngikashi ibaluluka ; mufubo wa Mwanana Yesu Kilisto ku

kalufadiyo uba kitshi ngikashi ipya. Patukamiina'shi Fumu Yesu bafwile ku nkuluse pa mwanda wetu, betu suula ku milwisho yetu na betu fikisha bapwandjikiile kwimana kumpala Efile-Mukulu e selele, byabya tubapete muwa upya. Mu yino senga, « ...booso mbalwishe » mutumibwe Mpolo aleesha bipatooka, kineemo kyetu mu mukanda waye kwi beena Looma. Tubadikye mu kipindji 6, bino : « *Anulubu'shi atwe booso babatshishibwe mwanda wa Kilisto Yesu tubabatshishiswe mwanda wa lufu lwaye su ? byabya tubashikilwe naaye ku lubatshisho, bwa lufu, byashi bu bibasangukile Kilisto ku bafwe ku ntumbo ya Yaya, byabya namu atwe twi na bya kutambuka mu muwa upya* » **Looma 6 :3-4** « *mwanda yawa bafu, babingishibwa ku milwisho* » **V 7** « nka byabya nanwe namu, emoneyi anwe banabeene bu bafwe ku bubi, anka nwtuule bu bee na muwa pa mwanda w'Efile-Mukulu mu Kilisto Yesu » **V11**. Patuki abakimbi kulekyelwa kwa milwisho na kupeta kipandjilo pa lukumiino ku mufubo wa Kilisto ku nkuluse, muwa wetu wa kala wa kwikutwena n'Efile-Mukulu ubalongamishwe na muwa upya ubabanga na kilisto. **Kolose 3 :3** Etulungula bino : « *mwanda nwibafwe, na muwa weenu ngufibwe na Kilisto mwi Efile-Mukulu.* » Atumono shi muwa wetu wa kala wa bubi wubaadi ulongamiswe musuusa umune bwa losoo ku mufubo wa Fumu Yesu Kilisto.

Bifundwe abitulungula namu mu **kimeeno kini kipya kibatutudilwe** : « *paapa pa batudi bafwe mu bilubilo byetu, betwikeeshe na muwa pamune na Kilisto (Nwibapashibwe ku buntu) na be tubushishe ku bafwe pamune na betu shadikile pamune mu mawulu mu Kilisto Yesu.* » Bena **Efeso 2 :5-6**. Mbalo yetu yi binobino na Kilisto mu ma mbalo iku mawulu, pasha pa yino senga. « *byabya namu tanuki beeni suunga bakutwe matalwa abu bena ewumbo ni nya, anka nwi bena ewumbo dimune na beena selele na bantu ba shibo y'Efile-Mukulu, nwi ba yibakilwe pa kibangilo kya batumibwe na batemuki : Yesu Kilisto nabeene ni mwikale ebwe ditoka dya mwipaka,* **21** *mwadiye lwibako looso, luludikwe kalolo kumune alukamina bwa kwikala ntempelo eselele mu Fumu .***22**. *Mwadi'ye, anwe namu, nwibebakilwe kumune, mwanda wa kwikala kishalelo ki'Efile-Mukulu mu kikudi* » **Bena Efeso 2 : 19-22**. Twi babungwe na Kilisto na twi bamunwe na senga na bikokoshi byayo. Mutumibwe, pa kufundjila bena fidipi, akula dimo shi : « *mwanda kibalo kyetu kya bwana ki mu mawulu, mwamwa mwatutengyela Fumu Yesu Kilisto [bu] mupaashi* » **Bena Fidipi 3 : 20**. Twibashinkamishibwe binobino, kaasha ku bintu bya pa senga, anka ku bu baana b'Ewulu.

Tu bakuulwa mu kingi kibangilo, binangu byetu, na bikitshino byetu mbi kunkushibwe kwi yawa betupashishe na kushi ku senga. Twina kitungo [bushito] bu byatumonanga ku mayi ekunundu.

Mutumibwe etu tentekyesha : « *Emoneyi anwe banabeene bu bafwe ku bubi, Anka bu beena muwa mwi Efile-Mukulu mu Kilisto Yesu* » **Looma 6 : 11**.

Twina byoso abitungu bwa kwikala na muwa wa bwina Kilisto mwi Fumwetu Yesu Kilisto. Senga tayina kyatwitupa.

Kwi kungi kushintushena kumwenekye kukatukila ku lufu lwa Fumu Yesu Kilisto.

1. **Kipaso kya kwelwa myabi kibashintuluka** : Isalele baadi mushi mwa mwiya, kyoso kibaadi mwina Isalele bwa kukita shi akokyele Efile-Mukulu ; nkulama mwiya anka tababaadi bya kwibikumbasha nya. Mpolo afundjila bena Looma'shi : « *byabya anuwuku shi kyoso akyakula mwiya ; awikyakula kwi baaba be muushi mwa mwiya bwashi : kukanwa kooso kuwumiine, na dingi'shi : ba pa senga booso bapiile kumpala kw'Efile-Mukulu. Ngi pa wawa mwanda takwi muntu aku bingishibwa kumpala kwaye pa mwanda wa bikitshino bya mwiya, mwanda ku mwiya ngi kwi kyukilo kya bubi.* » **Looma 3 :19-20.** Mwina kukumiina tamumunibwe na mwiya nya, mwanda mupete mwabi wa kipandjilo ku lusa, buntu bushi bumulombeene bw'Efile-Mukulu kwi muntu. « *mwiya ubaadi upebwe kwi Mosese ; buntu na Eyendo bibafikile kwi Yesu Kilisto* » **Yoano 1 :17** ; kunyima a kwakula shi : « booso mbalwishe na bekula na ntumbo y'Efile-Mukulu » **Looma 3 : 23** Mpolo atungunuka bino : « *abo mbabingishibwe bisumanga ku buntu bwaye mu kufungudibwa kwi Efile-Mukulu kibwikilo kya bubi pa lukumiino, mu lusa lwaye, bwa kuleesha kululama kwaye pa mwanda wa kulekyela kwa milwisho yakumpala mu lwishinko lw'Efile-Mukulu, bwa kuleesha lukumiino lwaye kwi bungu, bwashi ekale mululame na abingisha yawa e mu lukumiino lwa Yesu [bya ngakula]. Akwisadika kwi kwikunyi ?* » **Looma 3 : 24-26.** Nka penda pa mwanda'Efile-Mukulu bakitshine kukatukila kwi Fumwetu Yesu Kilisto kubatutambula kipandjilo mu kutuula lukulipilo mwadi. Ni penda lusa lukata na takwi kintu kyetu sunga kimune.
2. **Bipwano bibashintuluka** : Isalele baadi awuku nka penda Yepowa, Ayikalayika mu kipaso kya kubula. Byoso bibaadi bena Isalele abalongo bibafikanga kwadi, byoso bu bakuminanga kwi bafumbwila. Tupwanga kumona kwilekeena kwa kipwano kibaadi Adma na Efile-Mukulu na ngikashi mupya bafiki pakutandjikwa kwa bubi. Anka mwina kukumiina binobino batweshwa mu kipwano ki pabwakyu **na Yaya**. Twina bulungantu bwa kutwela mpwandishena kwi Yaya. « Na mu dyadya Efuku ta nwana ngipushe kintu suunga nkimune nya. Eyendo, eyendo nenulungula'shi bintu byoso bya nwanatekye Yaya mwishina dyande, akenupa byanka » **Yoano 16 : 23.** Fumu batekyele bino : « Yaya eselele, ebalame mwishina dyobe dibompele, pa mwanda wa'shi bekale kimune buu'twe » **Yoano 17 : 11.** Twina bulungantu bushi kishiko kwi Yaya na twi bashinkamishe makasa adi mupe umune na umune a bakumiine. Ku

byabya, twi baatshibwe mu kino kipwano kya kifuko na « Atwele musaase'shi Abba Yaya ! » **Looma 8 :15.**

3. **Mweno a myanda bashintuluka** : takubaadi mwina Isalele baadi mupebwe matalwa a kwisesela peepi n'Efile-Mukulu nya. Baabadi na kya kushaala paasha a kashibo ka mapema mu baadi Efile-Mukulu, nka penda ba tshite mwakwidi ngi babatwelanga bwa kufuba mifubo yabo. Tshite mwakwidi mukata musuusa umune ku kipwa, batwelanga mu mbalo yipatulwe ya kishila na mase batuulanga ku kilambwilo, bwa kushimisha milwisho kumpala yaye nabeene, akupu bubi bwa mwilo ooso. Muntu nka na kutshina pa kimeeno kyaye kumpala Efile-Mukulu E-selele. Binobino, kwi kushintushena mwanda mwina kukumiikna mutwalwe mu kipwano pepi n'Efile-Mukulu Yaya na apusha kalolo kepatshilo ka Efile-Mukulu, kiwukilo kya kipandjilo na myabi yoso ayikafiki a bitwala mashimba eetu mmu kutumbula uno Efile-Mukulu a kifulo na akupu, nkumulangwila na biloba na lutumbu kumpala a Yaya na kusepeela pa byoso byadi mwitukitshine.

[Kinokipindji kya katano kya kano kakanda (*Kutambuka mu etaata dya kilombeeno kipyra*) kyaluulwe mu Kisongye mu Kabinda, mweshi wakabidi mu kipwa kya 2025 kwi bakwetu bano : **Arthur NYINDU ASSANI** na **Ivon Kiluba Kibambe**]